

摛藻堂四庫全書薈要

集部

欽定四庫全書薈要卷一萬六千九百七十九

集部

大復集卷二十二

明 何景明 撰

五言律詩八十一首

雨雪曲

蒲海雲成陣天山雪作花長城烽火入野騎動鳴笳
霧深迷漢月風起暗胡沙一夜關河冷征人盡念家

星變

星變干常紀花開與令違九重方避殿四海望垂衣賦
斂何時緩流亡幾處歸廟堂圖至理早晚答天威

冬月

冬月今宵滿他鄉此夜情城高初影堞樓靜故當楹霧
濯寒輝苦風吹夕暉生捲簾愁不寐庭樹宿鴉驚

月食

月蝕中秋夜中天萬國看衣冠連大內鐘鼓動長安光
沒天河曉陰沈渤海寒聖心應念此長望五雲端

九月十五夜月

萬里高秋月青天此夜看乍流關塞影遙出海雲端淅
浙開風幔輝輝傍菊欄清笳奏城闕為報漢宮寒

中秋無月

月賞今年罷高樓獨客愁關山中夜笛江漢故鄉舟暗
雨捎簷入秋螢度檻流應知雲霧上天柱有人遊

六月望月食

未月黃衢厄妖遮赤道行魄殘疑近晦食甚始生明奏

鼓風飈慘登壇雷雨清櫬槍猶未掃天意豈休兵

元日

元日王正月傳呼晚殿班千官齊鵠立萬國候龍顏辨色旌旗入衝星劍珮還聖躬無乃倦幾欲問當關

五更

五更霜雪霽忽夢紫宸班天上傳鍾鼓風前想珮環鷄鳴無復詠馬動亦虛還憶在先朝日朝見聖顏

三月三日

病眼看天地風沙當
畫吹賞心孤酒伴行樂
過花時水曲蘭芳靜
城陰柳絮遲東郊有車馬春色報人知

秋夜

暝砌凝寒色高樓閉
綺櫳露蟲吟蟋蟀風葉下梧桐此
夜關山月何人悵望中冷然感秋思
况復聽征鴻

元夕

燈火萬家歡高樓玉漏殘舞留華月緩歌裏綠雲繁雪
郭春初霽烟城夜不寒畫橋垂柳外遊女珮珊瑚

十月一日二首

今日孟冬朔輕烟澹曉暎北風飄一鴈寒氣入千門
消息斷行客關河迷故園浮生元不定俯仰任乾坤

二

嚴霜淒卉木茲歲忽將周寂寂龍蛇蟄寥寥江海流暮
燈喧巷哭風角起邊愁不盡中原望難尋萬里樓

歲晏

歲晏看人事蒼茫繫所思浮雲當日暮積雪見春遲報

國元無術寧親未有期獨憐張內侍吟絕四愁詩

中秋

風塵悲海內滿月對長安聞道王侯第中宵宴未闌遏
雲吹玉管生水弄金盤獨念南征將關山此夜寒

三月三日

三月正三日長安春可哀鴈從南國至花向北人開戎
馬中原地鄉關萬里臺蹉跎嘆物色容易歲年催

清明日病懷

旅舍清明日長安新火烟桃花轉愁思竹葉興蕭然客
病閒官馬囊空澁俸錢故鄉聞稍定南望好林泉

謝崔太史惠菊

遺我高庭菊懷君秋樹林香添竹葉益色助草堂吟翠
蓋翻風檻霜天倚玉簪晚芳如不歇可比歲寒心

觀荷

入院高荷密留尊箇箇遲絳房扶水萼翠蓋倚風枝檻
坐明星夕牕過驟雨時流螢點點度故傍綠陰池

寺中吾子館海石榴

西林雲晝靜覆院海榴花生映東牕下疑窺隣女家枝
枝搖綠水片片落丹霞錯比珊瑚樹光輝逼一作日華
闌

汝慶宅紅菊二首

紅菊開時暮亭亭冠物華亦知顏色好不是艷陽花羅
綺嬌秋日樓臺媚晚霞清香如不改常傍美人家

二

秋花何太艷綠盛慰飄零笑比西施醉愁憐楚客醒雲

高開爛漫烟細裊娉婷好為多沽酒頻來倒玉瓶

沈道士館牡丹

仙亭牡丹樹不數玉山桃忽漫相逢處開花爛漫高彩
雲停度曲遲日動揮毫明歲天壇路春風憶錦袍

雨中紅芍藥

百花堪獨立一雨更風流日暮行雲女仙裳覆楚丘明
添丹臉淚暗抱錦心愁晴晝猶須賞何人駐紫骝

長安柳

三月長安柳春風吹暮天花飛御溝水葉傍漢宮烟繞
岸猶堪折臨流更可憐故園無限樹零落戰場邊

芍藥

城中芍藥偏席上把殘枝上苑相看日春風爾教遲艷
歌翻錦瑟酣醉倒金卮南國今開罷園亭數夢思

觀竹

相國西垣第新看種竹成葉香鳴鳳宿根古蟄龍生雨
洗琅玕色風傳竽籟聲山林輕肉食心跡喜雙清

魯山院竹

泰公堂下竹覆地，長新篁雨颭春牆碧。
風含石室涼經行，留下榻晏坐對焚香遺響流。
笙鳳時時落上方。

聞鴈

見汝今南下，憐予一望家亂聲。
求侶急高影，背人斜月靜林無葉雲。
寒菊有花萬行闌，塞淚秋日墮胡笳。

鸚鵡

不恨金籠閉，其如鐵鎖牢。
側身燕雪苦，垂翅隴雲高。豈

為能言語番令妬羽毛角鷹何猛氣翻掣錦韁絲

春鴈

花初肯楚澤雪罷度桑乾漸起隨春色高飛犯朔寒書
停江國望陣倚塞門看憶爾常南北無嗟行路難

鴈

嚙嚙胡笳怨飄飄南鴈翔長風度關塞九月下瀟湘積
水浮連影遙空起斷行故園秋望盡聞爾淚沾裳

聞鴈

鳴鴈南方去人今北地聞水寒沈塞角沙暮起秋雲獨
叫如求侶相呼恐失羣高樓潛望爾鄉思轉紛紛

麌

碧山誰放汝華館故相羈野性看人駭閒身顧影疑草
香春過處花暖晝眠時無限雲林好樊籠祗自悲

蘇子遊赤壁圖

垂老黃州客高秋赤壁船三分留古跡兩賦到今傳落
日寒江動青天斷岸懸畫圖誰省識千載尚風烟

彼美東鄰子

彼美東隣子花間白日醺纖腰人不見妙曲轉愁聞舞
罷空明月歌餘尚彩雲章臺楊柳樹花暮落紛紛

雪夜九梅翁園同蒼谷宴集二首

郊城風雪夜騎馬叩誰門乘興寧迴棹寬愁數倒尊
茆堂開洞壑楓岸疊沙村朝市山林意非翁未易論

二

冬夜南園集攜遊興未窮登臺望積雪下嶺逐迴風駿

愛林中馬冥思海上鴻不因蒼谷子誰識九梅翁

到鄆簡王敬夫

以下秦集

杜曲花無數城南柳更重去天惟尺五隔歲一相逢雨
過春波水雲開紫閣峯好陪王學士杯酒日從容

同敬夫遊至華陽谷聞歌妙曲

名邑今重過終南第一遊山中白雪倡天上絲雲流柳
散秦川色花含杜曲愁同時霄漢侶十載卧林丘

過康子德湧彭麓別業

不求金馬召翻愛碧山棲柳色閒門閉桃花曲徑迷酒
船時問字翠壁有留題只此林泉好無煩到滸西

答張道夫都聞病懷

不到將軍第秋清病起遲誰知平子後復有四愁詩月
幌臨書帖風庭掩戟枝東橋好山水何日赴幽期

九日同陳侍御鳳谷登宴

栢臺驄馬使蘭谷鳳仙家暫駐三秦節來看九日花風
霜高錦樹雲日麗清沙去去層霄上回瞻北斗斜

送間雲子還河內

爾西訪崆峒東隨河上公神仙自有友不與世人同王屋留雞犬天壇躡斗虹白雲從此駕去去入無窮

卧病簡汝濟士奇時濟二首

卧病常遲起焚香獨燕居聊因謝簿領暫得弄琴書獄色盈虛牖泉流繞暗渠雖然官府內不異在林廬

二

習隱開三徑耽幽構一齋吏人稀到戶鳥雀自馴皆樂

補身差健詩成悶強排同聲二三子不見好音來

一作懷

過馬谿田村居

宛宛清河曲團團翠竹村卧龍元勝地容駟已高門野曠嵯峨出天寒雲霧屯何時還過訪無限欲相論

冬夜過仲木

漢殿詞臣第秦川處士家過逢遙慰藉文翰轉光華夜興山陰雪春情渭北花江湖望霄漢相對一長嗟

寄彭幸庵中丞

山海藏身遠朝廷屬望頻駿功收戰伐龍卧偃經綸星宿黃河氣風雲華嶽神生才元有待終起慰斯人

贈張時濟陳伯行胡承之周少安三月三日出城

遊宴

芳筵開上日才子出京華暫別含香署俱停訪石槎秦川平對酒漢苑曲穿花應共題春草相過謝客家是日蓋時

濟邀
諸君

送張行人賁大行皇帝遺詔使秦蜀

我皇忽晏駕君行辭直廬九霄持使節萬里捧哀書湖
望雙龍鼎橋回駟馬車錦城花滿樹爭識漢相如

清明日病卧聞三司諸公出城

伏枕花辰過閉門尊酒空賓朋臨水上供帳出城中柳
色龍池雨鶯歌杏苑風秦川多勝事遊賞未能同

秦府進歷

寶歷頌天闢金樽宴錦軒萬年周正朔七葉漢宗藩向
日蓂階曉含風蕙砌暄同懽承睿欵歌舞頌乾元

拜將壇

漢主西封日淮陰拜將時壇場如往日朝代幾遷移王氣風雲歇雄圖日月垂江山弔故國誰復見旌旗

秦嶺謁韓祠

捫蘿登峻嶺級石上荒祠雪阻南遷路雲停北望時文衰真有作道喪已前知千載經行地高山空爾思

登五丈原謁武侯廟

風日高原暮松杉古廟陰三分扶漢業萬里出師心星

落營空在雲橫陣已沈千秋一瞻眺梁甫為誰吟

普緣寺有馬融讀書洞

春山尋古寺昏黑尚攀緣仄徑千盤轉巉崖萬仞懸虎
常啼白晝猿忽墮青天欲訪名賢洞泠泠隔澗泉

書院課士雨至有作

雨色間堂靜橫經坐晝深笙歌非絳帳絃誦有青衿竹
勁捎簷碧松寒覆院陰萬人憂早日洗耳聽秋霖

登樓鳳縣作

近訊中原使兼登萬里樓朝廷仍北極行在且南州
峽斷風雲隔江通日月流如聞乘八駿早晚向崑丘

東河三月晦日

雨宿東河夜送春山館寒遠沙霾霧樹危石上風湍慣
涉波濤險偏經道路難平生四方志回首欲求安

青峯閣曉露

初日東峯上微微露色分丹崖含宿雨青嶂拂歸雲候
騎林端發鳴笳樹裡聞前山更可愛晴望碧氛氲

草店雨行

山館夏陰澹雨行寒色
淒奔湍廻白石折坂下
青泥棧道常通北江流
却向西千峰問來路
烟霧使人迷

馬道驟雨復霽

萬壑驚雷起千峰鳴雨過
稍看風瀨減更覺夏雲多
虹飲垂青澗猿行掛碧蘿
山中無吏事長嘯荅樵歌

弘道書院

梁棟起層雲松筠散夕曛九嶠瞻泰岱清渭接河汾冠

蓋時時集絃歌夜夜聞登堂持節印衰薄愧斯文

咸陽原

千秋陵墓地駐馬惜茲行晚日登原殿晴天見渭城望
春時極目訪古獨含情奈有咸陽草風吹歲歲生

草堂寺

昔讀高僧傳今看勝地形院寒留檜柏殿古落丹青寶
塔參遺影荒臺問譯經駐車春日暮散步出林坰

說經臺

西海何年去南山萬古存風雲留福地星斗上天門有
欲誰觀妙無為自覺尊青牛不復返空誦五千言

普緣塔

石蓋凌空起丹梯出翠微雲從珠頂覆燈轉鏡中輝鴈
治波濤湧龍宮日月圍何能攀絕頂一覽漢邦畿

磻溪

丈人昔未遇垂釣此溪中不感風雲會誰知八十翁晚
楓漁浦暗春草獵原空獨令千載下懷古意無窮

長春宮

夜宿仙人館晨聞鳳吹停玉牕開曉月丹井汲春星久
秘長生訣空留不死庭下山回一望巖壑杳青冥

益門

益門通漢沔棧閣上雲霄蜀道從茲始秦川望已遙生
風隣虎穴迴日過龍標眇眇征途子雲山誰見招

新開嶺

塹山通大谷槎嶺掛天梯一作獨立飛雲上回看落日

低異花千種色。忙鳥百般啼。晚就松林宿。烟昏度碧溪。

一作寒烟

下碧溪

柴關

連峰入冥雨。絕壁閃餘霞。水認秦人洞。林疑謝客家。石
門踐苔蘚。源口覓桃花。他日求棲息。無言此路賒。

武關

北轉趨劉琪。西盤出武關。微茫一線路。迴合萬重山。天
地幾龍戰。風雲惟鳥還。關門鎖溪水。日夜送潺湲。

昭烈廟

漂泊依劉計
間關入蜀身
中原無社稷
亂世有君臣
峽路元通楚
岷江不向秦
空山一祠宇
寂寞翠華春

鹿苑寺

即摩詰宅

舊宅施為寺
青山屬野僧
高人不可見
勝迹已無憑
色借荒庭草
陰垂古殿藤
千崖一微逕
異代幾攀登

過華清宮

冬一作偶 駐華清殿
千秋憶翠華
青山無帝宅
荒草半人

家雪下湯泉樹春回繡嶺花長安望不遠誰見五陵霞

望終南

近覽南山霽遙迎西日曛黛橫千里色花抱一作五臺

雲城闕行相映川原望轉分丹梯懸石洞未訪赤霞文

首山

王君首山下新起讀書樓雲霧懸蘿入湍波湧竹流具
次黃帝宅嵩少羽人丘想待功成去方為此地留

兩河口

東下商南路西辭蜀北門青山兩河口古戍百家村曲
棧盤林杪危湍噴石根經過回首蹤跡半乾坤

大復集卷二十二



總校官庶吉士臣侍朝
校對官編修臣馬啟泰
謄錄監生臣令狐慕蜀

欽定四庫全書叢要

集部

大復集卷二十五

三至五

詳校官侯補通政司經歷臣鄒祚熾



欽定四庫全書薈要卷一萬六千九百八十

集部

大復集卷二十三

明 何景明 撰

言排律二十六首

上李石樓方伯

以下家集

三晉多人傑吾師出固然素汾經太岳紫塞入幽燕世
業端居里名邦倚舜田由來天運復誰謂地靈偏郭相
慚先達王通俟後賢明經超第一射策對三千感會逢

昌紀登庸起少年劒鋒寒照雪辭藻麗生煙博物張華
讓多才子建憐八义迎客賦隻字使人傳豈獨文章貴
還應器識全雄談飛玉露浩氣豁金天亮節唐元振英
風魯仲連青雲仍自致黃鸝任孤騫簪筆星辰上持書
日月前觸邪稱獬豸特立憚鷹鵠東觀臨晨入西臺薄
暮旋朝回焚疏草吏散閣陳編百采班行整羣公禮數
虔一年巡洛表兩命下秦川斧鉞威關隴舟船達澗瀍
石林風淅瀝霜仗月嬋娟邊徼兵宵遁茅茨犬夜眠激

揚弘憲度旌別布威權制作人文煥經行草木鮮闡幽
輝往哲訪古徧遺阡汲黯還辭漢張騫又使邊臺端堪
秉節湖上且移旛城接三江樹波通七澤蓮蠻夷恩已
洽州郡役多蠲糾察元無隱焚囂肯自便駐車仁雨渥
登座法星懸遠臬馳譽久當途薦疏聯碧梧看鳳時喬
木待鶩遷分陝推公輿封侯得傳玄開藩臨宋苑張幕
傍河堧位重心逾下名高守益堅薇花當省署棠萼滿
郊鄽聲價隆方鎮光芒動斗躔明堂求畫棟清廟想朱

絃冠準真時望王公勸早宣麒麟功不朽金石頌應鎬
愚本蓬蒿質那堪侍几筵垂髫蒙引拔撫志荷陶甄附
驥懷深願登龍感夙緣未除原憲病空負樂生愆舊業
心常在脩途步轉邇鸞鳴猶待律魚得敢忘荃草野瞻
飛蓋雲達望著鞭臨風歌此曲慷慨不成篇

寄徐博士二十二韻

有美雲間士才名洛下傳逢時不得意謫宦轉悠然殊
渥優文學清階謝糾纏班行亦霄漢官侶是神仙樓閣

星辰麗宮牆日月連院桃紅爛日闕檜碧參天賈誼為
王傅陽城淑後賢諸生攻誦法六館藉陶甄玉序金鏞
列虛廊石鼓懸雅音淒古調奇字索遺鐫劉向憂經術
揚雄困草玄羅傷廷尉宅座嘆廣文檀魯壁藏書日齊
門鼓瑟年青衿時涕淚學士盡奔遷鸚鵡愁金絡麒麟
恥玉鞭客心千里鴈歸興五湖船上國同傾蓋長宵更
接筵彩雲停翠管白雪繞朱絃悵別燕臺下淒涼楚水
邊海鷗終浩蕩天馬自騰騫明舊稀相見江湖益可憐

因風問消息尺素幾時旋

寄邊太常

不薄淮陽守翻辭大省寮聯翩追近地奉引憶先朝碧落仙人館銀河織女橋漢儀瞻鹵簿虞樂典簫韶日月旂常動星辰劍佩搖聳身殊道路回首隔雲霄河內猶宜借山陰豈見招乾坤五馬貴江海一麾遙雅識懷金奏同遊嘆玉鑣歲年雙轂轉歧路一蓬飄鸞翮終難鍛鶯遷本在喬九苞應不遠覽德是何朝

復菴王公錦

斯人中土彥未老即重泉薦鴈推前達乘驄憶少年聲
名起霄漢詞翰落雲煙志在身先退才高道亦全劍橫
常自許寶棄復誰憐世業襄城舊孤墳汝路偏脩文應
地下遺像儼生前未得瞻風槩空令涕淚懸

愚菴王公壤

大夫元曠達襟抱絕塵氛香署星辰列清班鶴鷺羣兩
都晉宦達百宋重廉勤要地能知止危途恥策勲早投

南郭隱不待北山文身向歸來健名從死後聞一官無
厚業諸子有餘芬鳴瑟哀梁木遺書落案芸風花虛館
榭烟草自丘墳野路東流水空山歲暮雲九原長不起
回首一懷君

雷

十月鳴雷動中宵萬壑哀初聞蟠地出忽覺繞庭迴夜
水蛟龍鬪寒山風雨來江濤何處折天柱此時摧詎識
乾坤意深愁號令垂攬衣還不寐坐望積陰閑

雨後溪園即事

偃息春朝晏輕陰散野園山雲行翠壁溪雨渡河源驚
浴晴相倚鳬飛暖自喧踈楊映遠岸細草入平原開徑
徒懷侶臨流且避誼豹終隨霧隱龍豈怨泥蟠鴻鵠皆
千里雞豚自一村幽棲何限意難與世人論

中元節有感

去歲中元節朝陵百職同嚴趨神路左遙拜孝園東龍
虎瞻王氣乾坤仰帝功未迴衡嶽駕空墮鼎湖弓啟兆

龜圖順編年鳳歷終玉衣陳畫幄寶瑟闋玄宮北極猶
前日南薰亦舊風病居逢此日長望五雲中

九日

盜賊無休日憑高淚滿纓岷峨日悽愴江漢失澄清故
國遺軍壁孤城傍敵營兵戈生朔氣鼙鼓入秋聲吹帽
他時興登臺此日情賓朋共一笑俯仰異平生黃菊淮
川晚丹楓楚岸晴蹉跎栗里醉憔悴澤中行近郭青山
抱迴堤綠水縈長陰接遠甸短日背高城墟里孤砧發

關河一鴈鳴臨觴憂戰伐對食想昇平元帥誰摧敵尚書尚用兵幽人獨北望疲卒舉西征秋圃芳菲雜閑門鳥雀盈垂蘿飄几席落葉裏簷楹夕竹捎煙勁寒花泣露明光陰玄鳥變湖海白鷗輕放逐寧違性棲遲且避名蒼生大臣在莫自涕縱橫

悼馬詩并序

予家買得一馬齒小而良丁卯歲季夏十五夜予忽夢一龍子立堦下跼蹐而死夢警僮在戶外呼曰廐

馬死廄馬死予怪且惜之作悼馬詩十韻

乘爾方踰歲何期病忽危四蹄猶未鑿雙淚泣長垂渥
水千年降房星一夜墮早逢田子嘆終共塞翁悲顧影
辭金絡遺骸戀敝帷詎能酬飼秣那復效驅馳苜蓿殘
空櫪莓苔滿故池風塵思駿力煙海失龍姿惆悵玄黃
句淒涼赭白詞平生精志在不愧主人知

郊觀二十二韻

以下京集

今代園丘地天開壯麗區神祇二后配禮樂百王殊制

作由皇祖儀章藉老儒萬靈欽受紀七聖宣承圖柴望
兼虞典登封畧漢模巍基錯采繪法象備堪輿丹戶乾
坤闢雕牆海嶽扶瑤壇上星斗琳觀俯虛無輔弼朝玄
座勾陳衛紫樞風含浴殿暖雲裊露盤孤好時瞻春祀
嵩高聽夜呼公侯守禁篋虎旅發金吾玉輦臨犧宰珍
饌走膳夫廟懸鑄鼓列庭舞羽干趨俎豆聯周簋圭璋
飾夏瑚祠官足錦繡道士住蓬壺澤草三花綻宮霞五
色敷時時聆磬管鬱鬱鎖松梧日月藏金櫃龜龍秘赤

符祈天洪洛誥渡海斥秦誣杜甫唐三禮班生漢兩都
侍臣從此賦千載頌文謨

壽許司馬

間代生豪傑乘時見哲人雄姿龍馬異偉器廟廊珍浩
蕩天開運崔嵬嶽降神扶持元有自制作固無倫磊落
先朝事崢嶸報主身九霄隨日月萬里出風塵柱下曾
簪筆臺端早曳紳觸邪持豸角糾繆逆龍鱗道直官頻
謫時危志不伸流言鑠金石雅操厲松筠行路知桓典

專城借寇恂清譽高士論優詔闡皇仁紫禁彈冠入黃
沙捧節巡謙謨仍寡合正氣凜難馴厚寵臨危辱坐期
邁隱淪班行看解綬河上羨垂綺謝卧東山裡夷歸北
海濱蒼生懸望切青瑣薦書頻改革逢多難倉皇憶舊
臣帝心虛簡在神武藉經綸指顧三邊靜吹噓四表春
朝廷推汲黯帷幄用陳遵圖識魚蛇變營觀虎豹侁赤
墀分雨露畫省接星辰下殿常宣問臨軒數見親御香
携袖滿瑞錦賜袍新不屈朱門貴能憐白屋貧散銜時

待士開閣晚留賓片善無攸伏微言得具陳重闈俱饋
鑊諸子益振振寶氏燕山桂莊生漆圃椿趨庭羅彩服
列鼎席文茵夢燕佳辰協乘牛紫氣真庶司欽軌範斯
世待陶甄願保喬松歲長登要路津頌聲垂琬琰勲業
上麒麟未進瞻休采愚衷實忭忻魏公中土彥誰謂德
無隣

壽泉山先生

德業台衡望精神光嶽靈漢儲懷羽翼周士服儀刑綏

寫登三省臯比擁六經飛章白獸闔解組鳳凰亭慷慨
陽城餞悽惶楚澤醒丹心對日月白首卧滄溟積慶睿
源濬垂芳奕葉馨采衣萊子宴玉樹謝家庭海嶠神仙
窟煙霄鳬鶴翎棲身葺薜荔返老斲松苓花映衣裳古
芝凝眉髮青三山開壽域萬里動文星雨露知桃李春
秋報英蓂聖朝耆俊禮早晚賁雲局

簡粹夫

二十知學道于今猶未真白髮空愁我金丹不遇人側

身向天地舉足墮風塵乘雲空有興涉海浩無津間君能鍊骨妙論頗通神倘惠長生術高揖謝親賓

送梁鴻臚之什邡次孟望之韻

王官葉縣宰仙令漢庭聞寵餞傾朝俊清光憶近君鷁舟三峽去鳬鳥九霄分錦水流營月巴山入陣雲朝廷再遣將郡邑半從軍雍齒封侯地期君早樹勲

寄贈王子衡御史時按關中

獨坐清關內臺中覺汝賢亟峭天下險周召國風先按

節人文朗登臺使命宣。豺狼避驄馬，神鬼泣龍泉。文彩驚流輩徵庸，憶往年衣冠隨謁帝館閣。望登仙省接星辰，近池臨雨露。偏畏途逢改革新法忤權奸，放逐江湖去。飄零歲月遷地卑，棲鍛羽天近起聯翩。殘寇猶衝突，蒼生極倒懸。專征空授鉞，幕戰豈論錢。漂血江河赤，僵尸楚蜀連。俊才兼武畧要地，有威權馬上排金戰。軍前贈玉鞭，笑談安石計激切。賈山篇漢苑，南山下秦城北。斗邊相思一回首，萬里各風烟。

贈良伯

帝座神仙侶天河烏鵲橋常時異棲息今日共雲霄念
子飛騰入相看衢路遙人猶惜驥裏吾已嘆鷁鷀苑旭
高雲閣宮花並玉鑣明光羨起草努力在清朝

贈劉生

劉生何激昂下筆已成章誰敢輕年少吾尤重老蒼王
楊操翰墨游夏早升堂汗血真龍種奇毛本鳳凰炎天
留玉樹花夕映冠裳霄路雲鴻羽他時看爾翔

送鄭伯生送親還夷陵

送喜潘輿動承懽解玉簪私情烏鳥疏思詔鳳凰林畫
錦供萊服秋懷罷越吟路難回馭志江穩放舟心雨露
殘冬景風塵靜夕陰荆門巴國盡巫峽楚宮深碧樹猶
春色黃鸝更好音莫因鄉土樂長往故山岑

聞河南捷呈閣內諸公

近得河南定旋收東海疆元亮親受縛餘孽遠潛藏始
失徐關險終連郢塞長狐狸窺社稷蠻蟻竊侯王清洛

千營駐黃河一葦航詎能逃汝漢那敢傍嵩邙勇畧傳
諸將兵威借朔方中丞兼節制上寧極扶匡靂色瞻宮
殿陰氣散渺茫凱音連報捷獻壽屢稱觴天子開麟閣
羣公奉柏梁中興當此日漢武是今皇愴往衣冠禍哀
茲盜賊猖缺折悲相國開網見殷湯格鬪中原血誅求
海內瘡猶須哀痛詔可少治安章斟酌調元氣扶持立
紀綱薦新行太廟覽政坐明堂不獨鐵豺虎還應感鳳
凰蒼生倚君相拭目看時康

子衡在獄感懷二十韻

朋儕日乘蹇念汝涕如瀆賈誼生非晚鄒陽志不羣書
從梁獄上哭向漢庭聞天地虞羅密江湖釣餌芬路豺
那可問屋鼠竟難熏已懼蒼蠅點真成貝錦文神龍在
汚淖鷺鳥失青雲日月益還覆薰猗器不分斗間誰辨
劍野外枉懷芹談虎嗟何及七猿禍已云高才元脫畧
衆口但紛紜木直防先伐蘭芳忌自焚畫臺幽白日冬
井下霜氣曉榻明星替陰牆白草曛連縣虛繙尺牘

阻慙懃石父遭齊相鍾儀滯楚軍受書賢不死演易聖
猶勤繩綫終非罪文章固有勲燕臣霜霰烈庶女震雷
殷佇見天王聖金雞早赦君

寄題丹陽孫氏七峰山房

間爾山房勝青天秀七峰芙蓉疊日月雲霧裊杉松
倚嵒巒積牕通洞壑重丹霞互明滅瑤草自春冬靜得
沈冥趣幽探仙聖蹤源潭暗雷雨白晝有蟠龍

蓉溪書屋

書屋容溪曲雲林蜀嶺斜一經韋相業萬卷鄰侯家檻
護連枝秀池看並蒂葩謝庭森玉樹漢省接金華山月
岷峨雪江天灑瀨霞花潭通白石錦水出丹沙星野光
芒聚鴻霄羽翼遐地靈與文物今古擅三巴

方朔圖

調笑東方朔沈酣金馬門竊桃王母見懷肉漢皇恩月
下雙鸞返雲間八駿奔玉盤春不獻丹核代長存事往
丹青錯圖開錦繡屯素湍搖弱水玄圃折崑崙種樹非

潘縣迷花似楚村
千年一結實萬古自蟠根
海日紅猶爛天風裏更繁神仙
皆羽翼洲島異乾坤無路乘黃鶴
何由踏赤鯤市朝棲大隱那識歲星魂

友竹

買園惟種竹身與竹為儔一逕白雲裏千竿清吹幽江
亭朝對雨水榭早迎秋翠袖天寒倚朱絃日暮愁風因
故人至月為此君留逸駕今誰並前身是子猷人多嫌
寂寞吾獨慕清脩苦節長如此虛心不外求琴樽忘老

病几席共綢繆歲晚根逾固霜繁花益稠山空鷓鴣怨
海澗鳳凰憂高志寧須待深棲且自謀何因孤興發吹

笛上君樓

渡涇渭

以下秦集

北回亂涇渭東眺極澄瀛落日兩盪清遙天雙帶紫波
流互明滅岸折屢崩驚一作洲渚各縱橫隔樹一作歲望迴合分
濤揚濁清堰渠饒上壤形勢迥西京漕挽通秦甸津梁
跨漢城涇沈九州會雄壯八川名空挹入河志復含浮

海情風沙滿世路雲浪渺江程鶴去星源遠鯨翻霧島
輕片帆儻可借萬里自茲行

大復集卷二十三

欽定四庫全書薈要卷一萬六千九百八十一集部

大復集卷二十四

明 何景明 撰

七言律詩六十四首

舟次漢陽

以下使集

使客舟從漢口來武昌城對漢陽開千年洲在空流水
百尺樓高鎖舊臺太白未輕崔顥句老瞞元祐禰生才
山川不盡豪華盡落日烟江思轉哀

武昌聞邊報

傳聞賊騎近長安北伐朝廷已遣官路繞居庸烽火暗
城高山海戍樓寒一時邊將當關少六月王師出塞難
先帝恩深能養士請纓誰為繫樓蘭

長安驛

暮雨蕭蕭雲黯然數家山下起炊烟牕聞早鴈秋多思
門對寒流夜不眠遠使正持三楚節舊遊曾扣九江船
驛程南去無窮路來往風塵閱歲年

雲溪驛

雲溪驛裏經過處六七年間兩度行風土不殊初到日
雨牆難認舊題名異方見月思鄉縣遠客逢秋念友生
明日巴陵江上酒弟兄相對不勝情

岳陽

楚水滇池萬里遊使車重喜過巴丘千家樹色浮山郭
七月濤聲入郡樓寺裡池亭多舊主城中冠蓋半同遊
明朝又下章華路江月湖烟綰別愁

岳陽城中聞笛

何處笛聲三四弄，坐聽疑隔楚江漬。
落梅折柳怨清夜，激羽流商哀白雲。
月上山樓人獨倚，風高秋院客先聞。
洞庭空濶瀟湘冷，縹渺餘音送鴈羣。

七夕

夜久高城風露收，微雲斜漢兩悠悠。
閨中擣素思關塞，樓上穿針待女牛。
屏燭夜深秋似水，池花香淡月如鉤。
桂宮高處寒多少，誰念嫦娥此夜愁。

寄君山

塵踪西過巴陵地尚欠君山寺裡詩十里無緣携客到
六年不見使人思空巖竹映湘妃廟舊井潮深柳毅祠
湖上老仙誰得遇夜寒橫笛向江吹

華容弔楚宮

別館離宮紛綺羅細腰爭待楚王過章華日晚春遊盡
雲夢天寒夜獵多廢殿有基人不到荒臺無主鳥空歌
西江烟月長如舊只有繁華逐逝波

秦人洞二首

桃川道士來相送指點仙蹤玉觀西雲鎖洞門何處問
花開溪路幾人迷石橋自發新秋草丹竈長封舊日泥
落日山中不勝思松陰竹色冷淒淒

二

聞說秦人此避秦碧桃零落舊時春家移洞裡難知姓
水到人間易問津山色溪聲自今古石床磽戶空埃塵
洞前即是南征路來往年華容鬚新

月潭寺二首

玲瓏金刹白雲邊踏閣攀林一徑穿龍出洞門常作雨
鶴巢松樹不知年僧來殿上鳴鐘飯客到山中借榻眠
恠底夜來難得寐秋風牕下繞流泉

二

綠蘿陰下到蒲團茗葉松花進晚食近水雲霞晴亦雨
傍巖樓閣晝常寒旅懷寥落逢秋半僧話淹留坐夜闌
惆悵塵蹤又南去朝來鐘磬隔烟巒

出新添城

出城凝望一沾巾行到窮邊見洞民青草時多逢瘴死
白茅屋為住山貧秋來萬里倦為客日落千峰愁殺人
聞道徵兵需北戰朔方應已困征塵

憶中舍諸寅

憶昨共陪天北極幾回朝賀識龍顏簾開仙掖宮雲近
地隔金河苑日闌青瑣夜歸池上珮朱衣曉入殿中班
只今遠使違趨奉清夢常依霄漢間

憶諸同遊

冠珮長安多貴游別來時復見新秋花邊騎馬春遊寺
月下橫簫夜上樓鴻鴈不傳長道字江山應繫遠人憂
遙知賓館常懸榻經歲誰能為我留

安莊道中

處處人家空薜蘿幾年凋敝擾干戈山過白水峰巒峻
路入盤江瘴厲多嶺徼土風連百粵郊原人語雜諸羅
側身西望看銅柱此地曾經馬伏波

漢將祠

嵯峨高嶺入雲平
嶺上人傳漢將名
殊域歲時供祭祀
千秋祠廟著神明
古牆不辨丹青色
深夜猶聞劍戟聲
下馬獨來詢舊事
殘碑無字紀南征

新興

蕭條窮巷掩荆扉
立馬荒原見鳥飛
城為燒殘鄆市少
地從戰後草萊稀
烽生陰雨黃昏見
鬼哭秋山白日微
却怪當年出師者
豈無寸策達戎機

普安

日下孤城生夕烟相逢只說敗師年寨門晝閉青山上
戍角寒吹白漠前寇至不知重嶺隘兵來能得幾家全
居人尚想黠中將統領三軍獨晏然

九日默國後園二首

何處風烟消客愁將軍臺榭枕山丘一年又過重陽日
兩鬢空愁萬里秋水國陰多寒已至炎方霜後瘴初收
憑高欲送登臨眼更上池邊百尺樓

二

天空遠水明秋岸梧葉蕭森楓樹殘黃菊數從行處見
紫萸獨向醉中看浮雲樓觀滇城暮落日山川僰道寒
忽憶登高去年客慈恩湖閣共憑闌

白帝城

峽口風悲猿夜號孤舟燈火宿烟臯草深廢井人家少
水落寒山雉堞高自古金湯難恃險當時版築豈知勞
永安亦在荒城裏玉殿淒涼空野蒿

歸州

暮雲天際見高城行盡千峰峽漸平古郡山頭萬家住
客舟江上一燈明竹枝慣聽巴人曲鳥道纔通楚國程
未卜東歸何日到片帆斜月對離情

郢中

荆門南下接平疇蕭索風烟似晚秋衰草茫茫楚宮廢
荒城寂寂漢江流人亡異代空遺宅歲暮他鄉獨倚樓
最是陽春音調古至今歌罷少人酬

呂公祠 以下家集

落日蕩漾古水濱
邯鄲城邊逢暮春
趙王臺榭草花盡
呂公祠堂松桂新
馬上十年元是夢
世間何處可還真
黃金白髮俱閒事
赤日紅塵愁殺人

還家口號

十年奔走違親舍
此日歸來喜不禁
敢向明時輕組綬
祇緣多病乞山林
閑居擬著潘安賦
高卧寧知謝傅心
早晚南巖桂花發
開軒相望一長吟

高夔州先生示賞李秀才園中芍藥詩用韻奉答

李家芍藥開滿堂夔州太守更清狂題詩晚坐朱欄靜
對酒春憐白日長好為池臺留爛漫莫教風雨怨淒涼
佳期卧病難乘興悵望殘花憶謝郎

五日

五月五日天氣鮮艾葉榴花堆眼前鄉土歲時殊不惡
閭閻風俗自堪憐鄰人角黍能相送野老蒲觴得共傳
回首十年車馬地每逢佳節淚潛然

病後

病後頻驚節序過不將風景怨蹉跎秋來門巷依楓橘
歲晚衣裳戀芰荷洛下閒居辭宦早茂陵消渴著書多
鳳凰池上三年客驃橐空鳴白玉珂

吹笛

橫笛高城弄晚颺碧空如水鴈來時關山月落腸應斷
樓閣秋生響易悲楊柳天邊渾折盡梅花江畔故開遲
武陵回首南征路一曲那堪馬上吹

沈逸士來自吳下能詩善鼓琴間投篇什見訊顧
館於城中予以病不得造乃作此詩招致敝庄
寂寞秋山卧病年美人勞贈白雲篇陳蕃已下迎徐榻
王子寧回訪戴船郭外樓臺堪眺望水邊花樹足留連
廣陵失後無新譜莫惜携琴為我傳

邀沈清溪趙雪舟馬百愚登樓次百愚韻

村居邀客慚供給且為青山一倚樓十里沙平遙對酒
百年地迥更逢秋城中車馬何人到水曲風烟盡日留

無奈天涯歸思切孤帆八月下長洲

馬百愚同沈清溪見訪次韻二首

門接漁樵只數家柳條藤蔓轉相遮不妨佳句頻題竹
況有清尊共對花開閣定攀棲舊榻入溪還擬著浮槎
誰言人世相逢易浩蕩江湖未有涯

二

共憐野外多風景乘興間過碧水涯草閣連朝聞雅詠
楓江萬里得佳期馬卿作賦無勍敵沈約為文有妙思

莫向尊前話離別雲山秋色易生悲

十一月五日雨中邀沈清溪趙雪舟

仲冬風雨似秋來無客蓬門晝自開幽抱向人那得盡
窮愁泥我若為裁不禁遠岸梅花照更見孤城柳色催
三徑已拚留二仲相過此地莫遲迴

雨晴

竹裏柴門冬日輝水邊烟霧晚霏微背霜石壁丹楓盛
待雪沙田青麥稀自愛羣鳬將子去却疑雙鶴見人飛

西郊風物晴還好誰共看雲興不違

冬至

至日峨詩野水濱乍晴天氣最宜人簷前白日不覺晚
山下寒梅俱放春遠客盤食還偶共故園風俗自須親
病來又見陽回節鳴玉何由拜紫宸

立春

今年臘月逢春日喜見東風閼歲吹沙上柳條已堪把
城邊梅花亦不遲離離山郡開雲雪冉冉鄉園易歲時

欲與隣翁試新酒相邀酩酊莫深辭

燕子次杜工部韻

燕子飛時江柳春
眼看著節序幾回新
亦知社日歸鄉國
忍對秋風別主人
舒卷不殊羣物理
往來寧有百年身
空簾寂寞山堂夕
惆悵花枝淚滿巾

秋興八首

高樓一上思堪哀
水盡山空鴈獨迴
萬里關河迷北望
無邊風雨入秋來
故人尺素年年隔
薄暮清砧處處催

徒有寒樽對花發
病懷愁絕共誰開

二

憶在京華近侍年五更清珮入朝天鳳凰池接雙龍會
閣閣樓閣日月懸南國自通滄海貢胡塵不動玉門烟
只今病卧遙回首夜夜清光北斗邊

三

前歲今皇新御極鳳銜恩詔出明廷孤槎奉使日南國
萬里題詩天畔亭地入金沙江浩浩風連銅柱海冥冥

昆明亦在滇城裏池上虛疑織女星

四

蜀中形勝千年在
峽樹江花照使袍
神女廟深虛暮雨
漢王臺迥落秋濤
漁人東望滄浪濶
客子西來艷瀨高
不見啼猿繫舟處
風波遙夕夢魂勞

五

漢水東馳入楚來
長沙秋望洞庭開
江清樓閣中流見
日落帆檣萬里迴
去國尚思王粲賦
逢時空惜賈生才

湘南兩度曾遊地惆悵烟花暮轉哀

六

秋來門巷少經過日日幽懷對薜蘿一笑流光拋客路
十年歸夢落漁簑沙邊返照寒初斂水上浮雲晚故多
苦憶梁園辭賦客黃河愁望渺烟波

時李獻吉在汴州

七

裊裊西風歇衆芳天高谿谷迥烟霜孤城落鴈衝寒水
萬樹鳴蟬帶夕陽塵滿一區揚子宅蓬生三徑蔣公堂

相遇未有裘羊革醉裡狂歌亦自長

八

千年申國有提封楚塞重關渺未窮舊事祇看東逝水
高臺不斷北來鴻連山落木蕭條後閑坐殘花悵望中
正是平居多感慨底須辭賦答秋風

聞望之買馬促裝以詩留之

聞君買馬衝宵發正為慈顏在遠京已喜尺書前日至
不妨旌節隔年行故鄉歲暮難為別長路天寒益繫情

擬辦盤食留暫住况逢風雪阻嚴程

同焦太史游青峰禪寺

裊裊丹梯百丈懸上方宮在白雲間川原暮過淮西雨
樓閣晴開楚上山厭逐風塵為客久喜將樽酒對僧閒
同遊更有情親在並轡山中日往還

十二夜月

待月東林月未圓水邊樓閣半輪偏誰家玉笛休空怨
此夜清樽益可憐即向乾坤生羽翰更看江海淨風烟

停杯席上遙相問却愧當年李謫仙

人日懷孟望之

人日登高聊引興萬峰寂寞對申臺鶯花出郭還難見
雨雪逢春尚未開沙畔柳條悲暮角城邊栢葉照寒杯
關河悵望東歸使渺渺孤槎幾日迴

贈袁將軍惟武

雄劍光寒射早秋南征曾共伏波謀萬營貔虎胸中算
八陣龍蛇掌上籌誰識淮陰堪拜將獨知定遠合封侯

漢家武畧多名帥功在雲臺百世留

寄贈劉東山先生次林都憲韻

一疏歸來卧舊山幾回天上識容顏城邊黃石留侯去
海內蒼生謝傅閒日月夢隨天闕仗烟波家在洞庭灣
南瞻江漢無多路不得乘槎一往還

寄懷端虛堂

草堂風物迥無倫夔府詩成更有神携酒幾時容入社
卜居今日願為隣謝安亦有東山妓文舉元多北海賓

珍重城邊花竹樹年年不厭訪君頻

酬高新甫

連篇落落見才華未報瓊瑤祇自誇靈運詩成應夢草
江淹筆在更生花行吟出郭愁仍破病起逢春思益嘉
不惜清詞三百首品題常到野人家

代孫太守自題沱西別業次劉東山先生韻兼酬

東山

黃鸝未比謝家莊綠野還連晉國堂亭榭寥寥看市遠

江湖渺渺接天長慚過高士蓬三徑喜望佳人水一方
安石他年如未起賦歸應許共徜徉

寄張別駕

苦憶朗陵張別駕尺書今忽到林丘江東亦起秋風興
溪上難忘雪夜舟山郭有花空悵望水亭無客自淹留
汀蘭岸柳俱相待莫負清樽此日遊

九日不見菊次劉朝信韻

一秋風物已淒涼九日無花只斷腸徒把青樽留客醉

不教繁朵向人黃鳴絃急管休相聒舞蝶遊蜂莫自狂
獨坐孤城正愁寂更堪落木下斜陽

夜坐

暮雨寒雲黯復開山齋獨坐思難裁水生門外沙鷗至
月落燈前江鴈來四海交遊總霄漢十年蹤跡但塵埃
長安不見空回首歲晚愁登萬里臺

九月二十六日同賈廣文劉舉人任貢士高夔府

先生宅內賞菊四首

陶令門前花盡開
郭西騎馬看花來
疎枝淡蕊寒仍發
細雨斜風晚更催
擬向夜深還秉燭
可憐秋盡始傳杯
相逢一笑真非易
共把繁枝醉不回

二

秋來搖落倍堪嗟
喜見孤芳殿物華
深院護籬元密密
小堂穿徑故斜斜
清詞屢動詩人座
白酒還逢處士家
老逐少來無住日
莫教空負滿頭花

三

淺白輕黃千萬枝幽香今日始相期雨中籬落人稀到
水畔亭臺蝶不知折向秋風堪寄遠種因晚節故開遲
去年此會今皆健來歲花時可對誰

四

野店山家閑已殘寒來移近曲闌干亭亭似與霜華鬪
冉冉偏隨月影繁千里况逢佳客賞幾人能得故園看
清尊歲暮東籬下采采金花不滿盤

大復集卷二十四

欽定四庫全書會要卷一萬六千九百八十二集部

大復集卷二十五

明 何景明 撰

七言律詩六十六首

生子

兩歲歸來生兩雛故園夫婦亦相娛盧家自愛添丁好
徐氏誰言二子殊未論圖書能繼業且教門戶有懸弧
劬勞正念吾親在更遣悲歡此日俱

溪上

溪上茅齋不掩扉西風初罷芰荷衣月寒沙柳蕭蕭落
天晚江鴻蕭蕭飛野客哦詩水邊立家人沽酒夜深歸
相逢醉語休辭數城外黃花漸覺稀

無題

艷舞嬌歌出絳紗黃金不惜教琵琶鴛鴦本是雙棲鳥
菡萏元開並蒂花紫玉豈忘韓重侶綠珠寧負季倫家
多情自古還多恨腸斷春風巷柳斜

次韻答莊國賓見訊

多病無能合罷官
清時那敢獨求閒
遠沙月出明如水
高樹雲來暗似山
已恨緇塵侵素服
不教青鏡老紅顏
美人歲暮勞相問
叢桂山中祇自攀

贈潁川張子辰秀才

聞君已是青雲翼
萬里飛騰竟若何
縱有當時許由耳
莫教更洗潁川波
麒麟自掣黃金鎖
騾橐終鳴白玉珂
知爾匣中雙寶劍
塵埃他日為誰磨

答雷長史四首

每誦清詞動我愁山中歲暮若為酬因攀桂樹遙相憶
欲寄梅花可自由萬里江湖雙涕淚百年天地幾交遊
誰憐舊日中朝客謫向玉門半白頭

二

玉壘青城萬里山亦知歸興滿鄉闕沙邊返照寒將斂
江上行雲晚未還道路南來多壅隔雲霄北望少追攀
曳裾受簡皆清事莫向滄浪羨我閒

三

汝上相逢歲已長故人官況近荒涼天涯白髮催遲暮
客裡清尊送夕陽賈誼功名終負漢馬卿詞賦尚遊梁
看君尺素遙相慰況是羊何有和章

四

十載寒氈鄭畫師風流文采更堪思朱門鼓瑟官仍達
青殿揮毫出每遲百里風烟還薄暮孤城雨雪已多時
極知歲晚傷心切起傍宮梅自詠詩

送馬公順視學湖南四首

關中人物從來盛，況汝才名天下。
稀得路驛騶，看獨步出塵鷹隼羨高飛。
十年京洛猶今日，萬里江湖更落暉。
同是燕臺舊遊客，可堪相見又相違。

二

洞庭雲夢眼中寬，襄國荆門掌上看。
三楚樓臺皆壯麗，萬年江漢自波瀾。
烟花白日空愁暮，鴻鴈青春尚避寒。
莫道秦川歸未得，人間今日路行難。

三

兩年懷抱值君開聞說京華首重回天上故人難再見
世間歧路轉堪哀孤舟落日三江口遠客浮雲萬里臺
南斗尺書相望切暮天鴻鴈幾時來

四

武昌南望盡雲沙楚岸湘亭更好花桃李百城開士館
星河中夜傍仙槎南宮書畫新連舫吏部文章舊滿家
直北五雲天更遠欲從何處望京華

王君宿邀蔡大尹過予舍至期雨候蔡不至作詩

促之

招邀數費主人迎枉顧何慙令尹情祇為泥途妨出郭
未應風雨却寒盟雲間不見仙鳧下花外如聞駿馬鳴
玉鵠凌空休更怯銀鞍傍險亦須行

讀李子良獄詩有感

北朝宮闕已陵夷南渡衣冠更亂離誤國始知金櫃冊
蒙塵空嘆翠華旗龍爭虎鬪中原破海倒江翻萬古悲

猶是昔時歌舞地風塵今日淚還垂

早春眺望

山郭輕寒細雨開水邊沙逕獨徘徊艱難世事棲田里
潦倒年華斷酒盃晚日殘霞皆自媚白梅青柳遞相催
茅堂春色無人見迸淚看花日幾回

感春

羸病江湖春意生清沙遲日眺一作照孤城緣堤慙柳葉
相暗隔屋山桃花獨明萬里江天雙起鴈誰家園樹亂

鳴鶯風光物色元非惡觸目經心偏苦情

寄五清先生

地北天南一寄聲楚山蜀道兩關情
他鄉歲月仍羈旅
故國風塵尚甲兵
張翰本非思玉鱠
謝安終不忘蒼生
遙瞻山斗徒勞仰
苦恨江湖不易行

懷天涯先生

六省尚書第一班
兩朝元老領千官
空教外國聞裴度
未見東山起謝安
歸去朝廷公望重
老來湖海路行難

兵戈此日交馳檄將帥何時議築壇

寄希哲望之二兄

東風悵別十年懽北斗愁臨五夜看海內君親情獨苦天涯兄弟見俱難孤城落日黃鸝暮紫塞青春旅鴈寒君夢可曾回故里予心終日在長安

寄任司訓

江湖不見任公子風雨常懷老鄭虔異域親朋皆萬里故鄉花柳又新年青春已共浮雲去白日難同逝水還

為道故人從別後一身顚額淚雙懸

寄馬君卿固安

絃歌今作王畿宰辭賦元傾上國人易水塵沙連雨雪
漢家樓觀接星辰交期祇望雲間履生計猶慙海上綸
冠盜縱橫朋舊隔江湖此日淚盈巾

雨中留蔡黃二親

門巷泥深過客難百年聊共此盤餐浮雲落日山河暮
細雨青春樓閣寒近夜蛟龍還入浦久陰鴻鴈更移灘

年華滾滾相逢少莫厭板留到夜闌

清明日上先祖并兄墓

城西鬱鬱見佳城駐馬山頭悵獨行萬古松楸此丘壠
百年花柳又清明音容地下空成夢骨肉人間益愴情
更望老親封墓地恨隨春草一時生

袁惟武邀客泛舟夜下次韻

春水逶迤碧樹邊滿筵賓客醉開船情親不厭頻來往
語笑何妨更接連遙岸星河天共轉近城鍾鼓夜初傳

人間此會真非易袞
冉春風為爾憐

葉四公子西園

邀客西園公子家東風二月已飛花巷遮碧柳行春馬
樓倚青山落暮鴉移席尊罍遙出浦入舟燈火更依沙
清吟况接同鄉彥應有文星動天涯

張太守宅同賈長教會集

遲日香風細細迴招邀更喜廣文陪千年又下南州榻
二月同傳北海杯午院雲陰移几席春城雨色映樓臺

三鱸五馬皆高客獨愧江鷗共往來

春興

東風回首即殘春日日清江愁白蘋北去雲霄無道路
西來天地有烟塵身經貴賤知文態事到安危憶古人
却喜故園桃李樹花開又見一回新

袁冲霄先生同惟學過訪

風起高城春日斜相留肯醉野人家白雲對酒看山色
青草題詩到天涯隔岸鳴鶯深坐樹傍樓飛燕故穿花

竹林萬古追遊地二阮風流未足誇

同高鐵溪先生劉朝信兄宿賢隱寺次韻

雨過青山暮色來僧堂客至燭花開半空樓閣星河動
滿院松梧鶴鶴回浮世黃塵兼赤日古人白骨已蒼苔
兵戈此際同盃酒愁聽春城鼓角哀

袁惟學南園

樹裏行盃坐日斜池邊立馬聽鳴鶴苔陰雨暮寒青竹
水色春深靜白沙開徑蓬蒿無俗客入城花柳似山家

百年懷抱君應識不是淹留為物華

登謝臺

故國蕭條登此臺暮雲春色轉相催蓬蒿滿地悲風起
樓觀當空倒影來山鳥不隨歌舞散野花曾傍綺羅開
今來古往無窮事萬載消沉共一哀

楊花

三月楊花裏裏白憂人淚點暗中拋漫天撲地有何意
惹草粘沙多似毛忽趁狂風翻自遠更遮落日強相高

紅塵滿眼青樓暮攬亂春愁為爾勞

暮春

城邊楊柳飛白花河上春風吹暮沙飄飄歲月此雙燕
渺渺江湖聊一槎人情翻覆似波浪世態變化如雲霞
駟馬高車有憂患只須料理東門瓜

秋夜

黃菊花垂霜月陰碧林丹樹各蕭森關山日暮豺狼近
海水天寒鴈鶩深萬事誰能看倚伏此身何必問升沉

干戈未息瘡痍在永夜遲迴折寸心

賢隱寺別劉朝信

臘近孤城送客難一尊蕭寺共悲憊山空木葉鳴風急
水曲松林背日寒歧路人間妨躍馬十年天上憶鳴鸞
知君此去長安近擬向雲霄直北看

歲暮

歲暮孤城日易陰溪邊茅屋苦寒侵江湖更覺龍蛇遠
霜雪翻教燕雀深病起一身惟縱酒愁來雙淚忽沾襟

山林鐘鼎皆吾志北望悠悠萬里心

對雪懷劉朝信

十月孤城雲黯然萬峰飛雪此溪邊烟霞細細縈寒日
風急飄飄落暮天何處玉珂迷紫陌幾家銀燭照華筵
茅堂此際堪乘興不放山陰半夜船

寄胡宗器悼內

玉簫不聽鳳凰鳴銀漢愁看織女星永夜機中悲蟋蟀
十年牕下拾流螢白頭司馬空多恨清淚安仁更苦形

見說生兒是奇器他年應慰九泉靈

穀日

翠壑烟開風滿林岸雲沙雪暝陰陰城邊爪地謀生計
溪上青山獨往心野客開樽閒共語田夫負耒亦相尋
茅堂春事年年異不廢鶯花此日吟

送任宏器入京二首

四十功名亦壯年丈夫才氣豈徒然渡河春羨蛟龍起
望闕晴看日月懸江畔梅花初送雪天邊楊柳正含烟

悲歌此日臨燕趙未許奇遊屬馬遷

二

與爾相逢已十年孤城此別意蕭然春來鄉里交游少
日暮江湖涕淚懸麒麟未應辭道路豫章終擬出風烟
因君遙起長安思況是征鴻又北遷

再送宏器

春日城邊駐客車夕陽山下惜離居燕闕悵望風雲外
楚水分攜雨雪餘萬里登臺先郭隗十年題柱老相如

長安三月鶯花爛得意休忘尺素書

題葉邦重山水畫限韻

我愛君家畫裡峯更看茅屋傍雙松白雲不是人間路
滄海終期物外蹤野徑一春無駐馬石潭深夜有蟠龍
移家欲向溪邊住坐聽青山日暮鐘

題張給事安期圖為乃翁壽

黃髮仙翁白鹿車安期親見棗如瓜玉盤已獻千年實
玄圃先開五色花壺裏青天長日月眼中滄海又塵沙

觀圖究識封君面壽酒頻來給事家

贈楊靜之歸真陽

人物遙從泮水看眼中鄉里舊衣冠江鴻終擬登達路
海鷗還應愛羽翰九月黃花聊對酒千山紅樹正憑欄
真陽城外秋仍好悵望西風白露繁

到寺

樓閣山空暮景懸上方鐘鼓晚來傳白雲獨照孤燈裏
新月遙臨雙樹邊常怪陶潛慵入社亦知蘇晉愛逃禪

高僧老衲真吾侶蘭若松林可度年

太虛上人為起書樓

書樓新起賴休公況接丹梯百丈通祇為雲松巢此地
不須車馬到山中白雲倚檻臨丹壑明月開軒坐碧空
更作百年投老計已將別業傍禪宮

遊西山胡本清邀留

獨馬尋僧春到寺萬山邀客晚登臺野人門巷松邊入
稚子盤餐竹下來江鳥亦隨山鳥喚紅花偏映白花開

頻遊苦為東風意
况是情親豈浪猜

新色寺與諸生留別

落日鄉山客淚邊
離懷相對各淒然
秋原臺殿臨寒景
長路風塵入暮天
去國已違丹壑志
望鄉空賦白雲篇
平生師友兼恩義
未卜相逢是幾年

趙生書屋

城中無日不塵埃
騎馬尋朋此地來
籬落過人驚鳥雀
庭階留客掃莓苔
不妨濁酒綢繆醉
况有秋花爛漫開

人世相逢元未易高城鐘鼓莫頻催

題任宏器思親卷

十載音塵別夢遙月寒山色暮烟高慈烏樹老情空在
杜宇林疎血未銷恨入東風傷綠鬢淚隨芳草濕青袍
海天恩義憑誰話日斷雲孤思正勞

贈嚴生

嚴生開卦南門市一日聲名動此邦共喜君平今有後
誰傳郭璞世無雙白雲晝覆焚香室清月宵臨讀易窓

不把升沉更問汝行藏吾已傍滄江

述懷

紫芝黃獨幾回新霜雪山中又見春萬古光陰雙過客
五年江海一歸人豺狼滿地無行路戎馬他鄉有戰塵
澠水河邊釣臺上分明天與此閒身

送周大

月白寒城菊有花孤燈落葉映交加冬亭霧露蒙沙曲
夜閣星河傍天涯千里賓朋常命駕百年公子更通家

梁山楚水無多路來往風塵易歲華

題劉朝信唐學士瀛洲圖

香裊重簾玉署清翠微樓閣報平明花邊歸馬仙袍濕
柳外啼鴉御苑晴秦國姓名青簡重龍圖風月彩毫輕
千年芳躅君應接共看層空一鶲橫

送惟學南還

以下京集

一年賓館空彈劍九月燕京未授衣世路風塵悲旅鬢
春園花竹夢荆扉扁舟舊泛心常往萬卷今開志豈違

京國重來又三載臨歧真恨不同歸

送趙司訓喪偶還羅山

燕姬砧杵催楊柳楚客衣裳緝芰荷宦况不為游遠賦
閨情空續悼亡歌愁聞鄭監青旛苦老覺安仁白髮多
日暮千山歸故國秋深一鴈度黃河

送易太史歸省湖南

楚鄉秋去息風塵碧石清沙江色新入里競迎金馬士
趨庭遙拜白頭人天邊拄杖尋南嶽海畔登樓望北辰

亦是長沙詞賦客莫看搖落重傷神

八日王宗哲宅見菊

燕臺菊樹艷秋堂楚客鄉心益渺茫人世幾回逢一笑天涯明日過重陽高雲錦石寒相映細雨清沙濕不妨況是右丞多雅詠可能無興醉花傍

九日雪答崔太史

常年九日多風雨風雪今年更可哀颯颯仍兼木葉下輝輝故弄菊花開閑河朔氣催燕塞城闕秋陰起漢臺

今日春秋誰紀異亦知君是廣川才

苦熱

燕京閏夏清涼阻楚客羸軀毒熱偏雨過即如卑濕地
雲來翻助鬱蒸天南邦僻地寒江閣西嶽高峯玉井泉
思有丹梯凌倒景恨無孤棹截長烟

雨中

苑上行雲細裊裊城邊鳴雨忽垂垂炎天樓閣虛相映
燕地風塵日自悲滄海未通吳貢賦黃河猶閃漢旌旗

腐儒退食真何補悵望寒江暮有思

聞河南寇

檄書近報河南寇楚塞梁闕轉戰空豈有兵車能遠救
即愁道路阻難通江淮城塹西南險嵩洛山川天地中
今日至尊憂不細幾時諸將捷音同

西海子

寺下烟波春不開苑中風浪隱樓臺源泉細繞西山出
雲氣深從北極來萬里乘槎觀日月十年登閣望蓬萊

黃塵碧水須臾事莫使魚龍夜夜哀

汝忠宅待月同望之

空堂濁酒三人醉萬里清光迥未開深夜西隣還鼓吹
東望有樓臺虛疑星漢城邊照實怕風雲海上來
孤燈各愁思九關哀角更相催

大復集卷二十五



總校官庶吉士臣侍 朝
校對官編修臣馬啟泰
謄錄監生臣令狐慕蜀
謄錄監生臣沈 智